

**Sujet:**

# „Laade, Lääse, Lösche“



Han y doo grad aine gheert motze?:  
„En \*Ö\* im Zeedel syg zem ko...omysch  
aaluege!“  
„Das schryyby me doch mit emen \*E\*!  
Das kenn doch jeede Lääser gseh!“  
Rächt hesch Bebbi, Rächt hesch, hösch!  
Dr Byfäähl sett haisse: „Lesch!“ – nit „Lösch!“  
Doch dangg den Äpps und Internet,  
wo hitzuedaags jeede Däppy het,  
khasch noonem Aabelaade und Lääse  
- und als online-beläase Wääse –  
sälber uff em Tötsch-screen riehere  
und all die \*Ö\*s \*E\*-lymyniere!

**...Laade, Lääse, Lösche, Pfuuse!  
Wär git hitte no druggty Zeedel uuse?...**

Au d Zyttyge wärde noo dy noo  
eleggtronysch uusekho!  
D BaZ bewyyst das – und au dr Blick –  
Au s 20Minute suecht „online“ s Gligg.  
D Taageswuche macht das au!  
Und dr BiBo.... ok, das liist kai Sau!  
Fertyg mit Zyttyge uff Papyyr!  
Wills Papyyr fir d Zyttyg syygy z tyyr!  
D Zuekumpft gheert de Bites und Bits.  
Nur yrrytiert my das e bitz!:  
Wo verschtegg y jetzt am Morge  
myny letschte Alltagsorge,  
wenn am Gipfeli-Zmorge-Tisch  
d Sicht uff d Frau nimm behinderet isch?  
Wie khan ych bym Kläär-Schlamm-klääre  
myny Schtunde-„Sitzyg“ uffem Abee erkläre?  
Und wär erklärt mir (\*verdoory!\* \*gopf!\*)  
Wien y eleggtronysch d Schueh uss-schtopf?

**...Laade, Lääse, Lösche, Lyde!  
Myny nasse Schueh sin nit z benyyde!...**

Ai Vordail het die ganz Entwigglig:  
Altpapyyr im Trämmli isch nit „schiggig!“  
Drum laadet eich die News doch aabe!  
Dient eich am Aabeglaadne laabe!  
...Nur dängg denn draa: Es isch esoo:  
De settsch dy Ai-Päd nit ligge loh!

(Und bsitzysch du en Android?:  
Au dä ligge loh isch nid grad gschyyd!)

**...Laade, Lääse, Lösche, Dängge!  
Oder wotsch dr Ai-Pot em Trämmler  
schängge?...**

Dass alles doo uff unsrer Ärde  
mit dr Zyt sell papyyr-loos wärde,  
kenne mr trotz Drummlen und Pfyffe,  
an dr Wurzle paggt, nit rächt begryffe!  
Sells ächte Lääbe wytters glinge,  
sett me d Zyttyge wytters in Druggform bringe!  
Wurum das wytters selly gscheh,  
kasch in de näggschte Byschpyl gseh:

Es duet dr noonem WeCe nit vyl nutze,  
wenn d mit em Natel meschtysch s Fuudy  
butze!  
Wotsch s Zimmer schtryyche und farblig  
schtrege,  
kasch dr Boode nit mit em Ai-Päd degge!  
Wotsch Glas versorge und sottygy Sache,  
settsch es nit mit em LápTop mache!  
Und wott dy Tochter dr BüHa fülle,  
längt sy mit em Ai-phone bees in d Gülle!  
(Schrybt me jetzt \*fülle\* oder \*fille\*?)  
Raucht me jetzt \*vor\* oder \*in\* dr Knille?  
Alles Frooge iber Frooge,  
wo jede Zyttygslääser plooge!)

**...Laade, Lääse, Lösche, Grinse!  
D Lääskultur goht bees in d Binse!...**

Nur ai Persoon het an däm Sujet Fraid:  
S isch dr Morin Guy – rächt iberlait:  
Dä Laadet sich jo sowysoo  
d Biire voll bym Apéro!  
Denn Lääst är no s Grossroots-Protokoll  
und frogt sich drby, was das au soll!  
Uss Entdyschyg haut är s denn in d „Frösche“  
(bym Bollwärgg), zum dr Durscht go Lösche!  
Und het drnoo e volly „Bränte“!  
(Das, lieby Lyt, isch e Zyttygs-Änte!)